

115

29. ágúst

**REGLUGERÐ**

um breyting á reglugerð nr. 122 29. des. 1931, um einkasölu á tóbaki.

1. gr.

9. gr. reglugerðar nr. 122 29. des. 1931, um einkasölu á tóbaki orðist svo:

Hámarksálagning í smásölu á vindlingum, reyktóbaki, munntóbaki, vindlum, rjóli og neftóbaki skal vera 20%, miðað við verð Áfengis- og Tóbaksverzlunar ríkisins.

2. gr.

Reglugerð þessi, sem öðlast gildi 1. sept. 1961, er sett samkvæmt lögum nr. 58 8. sept. 1931, um einkasölu á tóbaki. Jafnframt fellur úr gildi reglugerð frá 23. ágúst 1958, um breyting á reglugerð nr. 122 29. des. 1931, um einkasölu á tóbaki.

*Fjármálaráðuneytið, 29. ágúst 1961.*

**Gunnar Thoroddsen.**

*Sigr. Klemenzson.*

116

4. sept.

**REGLUGERÐ**

um skemmtanaskatt í Hólmavíkurhreppi í Strandasýslu.

1. gr.

Samkvæmt lögum nr. 34 frá 22. nóvember 1918, sbr. lög nr. 30 19. júní 1922 og lög nr. 61 11. júní 1938, skal greiða skatt af skemmtunum fyrir almenning sem haldnar eru í Hólmavík og aðgangur seldur að og eigi eru undanþegnar skatti með lögum.

2. gr.

Þessar skemmtanir eru skattskyldar og flokkast þannig.

1. flokkur.

- a. Hljómleikar og söngskemmtanir.
- b. Sjónleikir.
- c. Kappleikar og íþróttasýningar, sem aðrir en áhugamenn taka þátt í.
- d. Kvikmynda- og skuggamyndasýningar.
- e. Fræðandi fyrirlestrar og upplestrar.

2. flokkur.

- a. Dansleikir.
- b. Danssýningar.
- c. Loddara- og fjölleikasýningar.
- d. Aðrar almennar skemmtanir, sem aðgangur er seldur að og ekki eru taldar sérstaklega.

3. gr.

Af skemmtunum þeim, sem taldar eru í 1. flokki skal greiða 10% af aðgangseyri og 20% af skemmtun í 2. flokki. Ef skemmtun er margþætt skal miða skattinn við þann þáttinn, sem hæst er skattlagður.

## 4. gr.

116

4. sept.

Undanþágu frá skattgreiðslu getur hreppsnefnd veitt, ef sérstakar ástæður eru fyrir hendi. Getur hreppsnefnd þannig undanþegið skemmtanir skatti, sem haldnar eru í góðgerðaskyni, svo og þær skemmtanir, sem haldnar eru sem fræðslu- og menningarstarfsemi.

## 5. gr.

Hreppsnefnd Hólmavíkurhrepps hefur eftirlit með því, að reglugerð þessari sé framfylgt og sér um innheimtu skattsins. Heimilt er hreppsnefnd að hafa eftirlit með sölu aðgöngumiða og getur hún enn fremur ráðið sérstakan mann til þess að annast eftirlit með skemmtunum.

## 6. gr.

Hver sá, sem halda vill skattskylda skemmtun, skal tilkynna oddvita eða eftirlitsmanni skemmtana, hvar og hvenær hún skuli haldin og afhenda honum til stimplunar alla þá aðgöngumiða, sem ætlunin er að nota við skemmtunina.

Eigi síðar en 2 dögum eftir samkomu, skal sá, er fyrir henni stóð, afhenda oddvita eða eftirlitsmanni alla ónotaða aðgöngumiða og greiða um leið skatt samkv. 3. gr. af öllum þeim miðum, sem notaðir voru.

## 7. gr.

Forstöðumaður skemmtunar ber ábyrgð á greiðslu skattgjaldsins. Ef fleiri en einn maður standa fyrir skemmtun, ábyrgist einn fyrir alla og allir fyrir einn. Sé um félag að ræða, ábyrgjast allir stjórnendur þess gjaldið.

## 8. gr.

Skatttekjur samkv. reglugerð þessari renna í sveitarsjóð, en halda skal fénu aðgreindu frá öðrum tekjum og verja þeim til menningar og framfarastarfsemi í Hólmavíkurhreppi eftir nánari ákvörðun hreppsnefndar.

## 9. gr.

Brot gegn reglugerð þessari varða sektum allt að 1000 krónum. Með mál sem kunna að rísa út af brotum á reglugerð þessari, skal farið sem opinber mál.

## 10. gr.

Reglugerð þessi öðlast þegar gildi.

*Í menntamálaráðuneytinu, 4. september 1961.*

F. h. r.

**Birgir Thorlacius.**

Árni Gunnarsson.